

Morning Regional Dogri News Bulletin, 06th August 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. केन्द्रीय मंत्री जी.किश्ण रेड्डी होरें गलाया ऐ जे जम्मू कश्मीर च विधानसभा चुनां सितम्बर म्हीने करोआए जांगन।
2. उपराज्यपाल मनोज सिन्हा होरें गलाया ऐ जे पिछले 5 बरें दरान जम्मू कश्मीर दी समावेशी विकास यात्रा दी लोह सदा थमां मती रौशन ते चमकदार ऐ।
3. केन्द्र शासत प्रदेशें लेई बनाए गेदे 5में माली आयोग दी बैठक च पंचैती राज इदारें ते शौहरी मकामी निकाएं दे कम्में काजें दा जायजा लैता गेआ।
4. मुख् सचिव अटल डुल्लू होरें हर घर तिरंगा कार्य योजना ते स्वतंत्रता दिवस दिएं तैआरिएं दा जायजा लैता।

<><><><><><>

Reddy J&K Assembly Election

केन्द्रीय मंत्री जी.किश्ण रेड्डी होरें गलाया ऐ जे जम्मू कश्मीर च विधानसभा चुनां सितम्बर म्हीने च कराए जांगन। उनें गलाया जे 5 अगस्त 2019 बरें दफा 370 दे हटने मगरा थमां जम्मू कश्मीर च पाकिस्तान ते ओह्दी खुफिया अजेंसी आईएसआई दी गतिविधियां बड़ी हद्द तगर घट्टी गेइयां न। केन्द्रीय मंत्री होरें जेह्ड़े जे जम्मू कश्मीर च बीजेपी दे चुनां प्रभारी बी हैन, कल आर.एस.पुरा दे बाना सिंह स्टेडियम च दफा 370 हटने दी 5मीं बरेंगंड दे मौके उप्पर बीजेपी आस्सेआ आयोजत एकात्म महोत्सव रैली गी संबोधत करदे होई गलाया जे दफा 370 दा हटना देश ते जम्मू कश्मीर दे लोकें लेई गर्व आला पल हा। उनें इस मौके श्यामा प्रसाद मुखर्जी होरें गी बी चेता कीता।

<><><><><><>

LG-Sinha

उपराज्यपाल मनोज सिन्हा होरें गलाया ऐ जे जम्मू कश्मीर च बल्लें-बल्लें स्थाई शांति परतोआ'रदी ऐ ते एह उपलब्धि सब्बनें लोकें दी ऐ। उनें गलाया जे पिछले 5एं ब'रें च केन्द्र शासत प्रदेश जम्मू कश्मीर च लोकतंत्र दी जड़ां मजबूत होइयां न। हाल च गै होए दे लोकसभा चुनाएं च लोकें दा बधी-चढ़ियै हिस्सा लैने, इस गल्ला दा सबूत ऐ जे ओह भारतीय संविधान ते लोकतंत्र उप्पर पूरा भरोसा करदे न। उपराज्यपाल होरें गलाया जे प्रधानमंत्री नरेन्द्र मोदी हुंदी अगुवाई च जम्मू कश्मीर दे समावेशी विकास ते समाजिक समानता दा बाद्धा होआ। समाज दे आर्थिक तौरा उप्पर कमजोर वर्ग दा सशक्तिकरण होआ ऐ ते जम्मू कश्मीर दी आर्थिक स्थिति होर मजबूत बनी ऐ। उपराज्यपाल होरें गलाया जे पिछले 5एं ब'रें च शिक्षा, सेहत, बिजली, लोक-कार्य ते शैहरी ते ग्रामीण इलाकें दा विकास मुमकन होआ ऐ। उपराज्यपाल होरें गलाया जे 5 अगस्त 2019 ब'रे मगरा थमां गै जम्मू कश्मीर च रौहने आले मर्दे, महिलाएं, नोजवानें, करसानें ते उद्यमिं दे जीवन च सकारात्मक बदलाव आया ऐ ते हुन ओह देश दे विकास दे कम्म च अपना योगदान देआ'रदे न। उपराज्यपाल होरें गलाया जे पिछले ब'रे रिकार्ड 2 करोड़ 11 लक्ख सैलानी जम्मू कश्मीर पुज्जे हे।

<><><><><><>

Fifth Finance Commission

केन्द्र शासत प्रदेशें लेई बनाए गेदे 5में माली आयोग दी कल अनिल कुमार झा हुंदी अध्यक्षता च इक उच्ची सतह दी बैठक लग्गी। बैठक दा मकसद मकामी शासकीय संस्थालें जियां जे पंचैत राज संस्थान ते शैहरी मकामी निकां शामिल न, जम्मू कश्मीर च केन्द्र आस्सेआ प्रायोजित स्कीमें दी असरदार अमलावरी च उंदी भूमका दा मूलांकन करना हा। बैठक दरान प्रदेश माली आयोग दी जम्मू लेई रिपोर्ट दिएं सफारशें पर तफसीली चर्चा कीती गई, जेहदे च लद्दाख खित्ते सनें सब्बने मकामी निकाए दी मुंतकिली बारे सुझाह दित्ते गे। घरें, कोठें ते शैहरी विकास दी कमीशनर सैक्रेटरी मनदीप कौर होरें केन्द्र आस्सेआ प्रायोजित स्कीमें दी अमलावरी च शैहरी मकामी निकाएं दी भूमका पर चर्चा कीती। उनें विकास गी जकीनी बनाने लेई मकामी शासकीय ढांचे गी निगगर बनाने पर जोर दित्ता। ग्रामीण विकास मैहकमे दे सचिव डॉ. शाहिद इकबाल होरें पंचैती राज संस्थानें दी कम्में ते कारकरदिएं दे बारे च आयोग अगगे तफसीली रिपोर्ट पेश कीती। सचिव होरें 15में माली आयोग तैहत कोई रकमां उपलब्ध नेई होने करी पेश आवा'रदिएं दिक्कतें ते चुनौतिएं गी बी उजागर कीता, जिंदे कारण विकास योजनाएं पर बड़ा माड़ा असर पवा करदा।

<><><><><><>

Panchayat Secretaries

ग्रामीण विकास विभाग ते पंचैती राज दे सचिव डॉ. शाहिद इकबाल चौधरी होरें कल जम्मू च नमें नियुक्त पंचैती सचिवें दी 28 दिनें दी सिखलाई प्रोग्राम दा उद्घाटन कीता। एहदा उद्देश्य नमें नियुक्त पंचैती सचिवें

गी लोड़चदे हुन ते ज्ञान कन्नै लैस करना हा तां जे ओह असरदार ढंगा कन्नै अपने कर्त्तव्य दी पालमा करियै अपनी सरबंधत पंचैतें दे पूरे पराते विकास गी जकीनी बनाई सकन। डॉ. चौधरी होरें प्रतिभागिएं गी समाज कन्नै सिद्धे जुड़ने लेई गलाया। इस मौके उप्पर ग्रामीण विकास विभाग दे डरैक्टर मुमताज अली होरें इस मौके बक्ख-बक्ख स्कीमें ते प्रोग्रामें बारे व्यापक जानकारी दित्ती।

<><><><><><>

Amarnath Yatra

जम्मू दे भगवती नगर आले आधार शिविर थमां इक जहार 873 श्रद्धालुएं दा इक होर नमां जत्था घाटी लेई रवाना होआ। 69 गड्डिडएं दे काफले च एह जत्था अज्ज बडलै रवाना होआ ऐ। इस जत्थे च 1 जहार 579 मर्द, 202 महिला, 65 साधु, 27 साध्वियां शामिल न। एह जत्था बडलै बालटाल लेई रवाना होआ।

<><><><><><>

Reasi Tobacco

इक आदेश च जिला मैजिस्ट्रेट रियासी नै भारतीय नागरिक सुरक्षा संहिता 2023 दी धारा 163 तैहत गुटका, सिगरेट ते होर दुइएं सरबंधत उत्पादें सनें तंबाकू उत्पादें दी बिक्री, कब्जे ते उपयोग उप्पर मूरी चैक पोस्ट, पैंथल नाका शा सब-डिवीजन कटरा दे रस्ते सनें ताराकोट रस्ते दे शुरूआत शा माता वैष्णो देवी भवन तगर इनें चीजें उप्पर प्रतिबंध लाई दित्ता ऐ। डीएम होरें गलाया जे इस आदेश दी खलाफवर्जी करने आले खलाफ भारतीय न्याह संहिता 2023 दी धारा 223 तैहत कनूनी कारवाई कीती जाग। उनें रियासी पुलस दे वरिष्ठ सुप्रीटेंडेंट होरें गी इस आदेश दी अमलावरी दे निर्देश दित्ते।

<><><><><><>

Chief Secretary

मुख्य सचिव अटल डुल्लू होरें औंदे स्वतंत्रता दिवस दे सिलसिले च सिविल प्रशासन ते पुलस मैहकमे दे वरिष्ठ अफसरें कन्नै इक बैठक लाइयै जारी तैआरिएं ते गतिविधिएं दी समीक्षा कीती। एहदे इलावा उनें “हर घर तिरंगा” कार्यक्रम गी लेइयै कार्य योजना दे बारे च बी चर्चा कीती। एहदे कन्नो कन्नी अटल डुल्लू होरें पैहली अगस्त गी शुरू होए दे स्वच्छता पखवाड़ा दे तैहत बक्ख-बक्ख मैहकमे ते जिलें स्थाबै कीते गेदे कम्में ते हासल उपलब्धिएं दा बी जायजा लैता। उनें जम्मू कश्मीर दे शैहरी ते ग्रामीण इलाकें च चलै करदिएं गतिविधिएं दे बारे च बी जानकारी हासल कीती। जिंदे च “एक पेड़ मां के नाम”, “एक पेड़ शहीदों के नाम”,.. ते होर दुए कार्यक्रम बी शामिल न। मुख्य सचिव होरें औंदे स्वतंत्रता दिवस गी लेइयै जारी तैआरिएं दा पूरा

ब्यौरा हासल कीता। उनें डिवीजनल कमीशनरें ते जिले दे डिप्टी कमीशनरें कोला बी सवतंत्रता दिवस समारोहें लेई तैआरिएं बारे तफसील हासल कीती।

<><><><><><>

DC-Udhampur(byte)

स्वच्छता पखवाड़ा अभियान तैहत आयोजित इक कार्यक्रम तैहत कल उधमपुर दिएं जिला विकास कमीशनर सलोनी राय ते एसएसपी जोगिन्द्र सिंह होरें चोपड़ा शाप इलाके च स्थित सरकारी मिडल स्कूल दा “शहीद कांस्टेबल सूरज भान गौरमेंट मिडल स्कूल” दे रूपै च नमें सिरिया नामकरण कीता। इस मौके मजूद किट्टै गी संबोधत करदे होई डीसी होरें राष्ट्रनिर्माण च शहीदें दे महत्वपूर्ण योगदान गी उजागर कीता। उनें विद्यार्थिएं गी आखेआ जे शिक्षा दा मकसद, ज्ञान ते कताबी पढ़ाई तगर सीमित नेई ऐ, सगुआं माहनू दा चौमुखी विकास बी ऐ जेहदे लेई विद्यार्थिएं गी अपने आपै गी तैआर करना लोड़चदा तां जे उंदे व्यक्तिगत दा पूरा पराता विकास होई सकै। इस मौके मजूद हस्तिएं शहीद कांस्टेबल सूरज भान होरें गी श्रद्धांजलि भेंट कीती, उंदे परिवार आलें गी सम्मानत कीता ते जोर देइयै आखेआ जे शहीदें दे बलिदान गी असें कदें बसारना नेई लोड़चदा। डीसी होरें इस मौके “एक पेड़ मां के नाम” ते “एक पेड़ शहीदों के नाम” अभियान तैहत बूहटे बी लाए ते लोकें गी बी आखेआ जे बूहटे लाने दी इस मुहिम च शामिल होन। साढ़े जिला संवाददाता अचिन दूबे कन्नै गल्ल करदे होई सलोनी राय होरें आखेआ.....बाईट

<><><><><><>

Ramban SHG(byte)

संपूर्ण अभियान तैहत रामबन जिले दे खारी ब्लाक च त्रऊं म्हीने दा इक विशेष अभियान चलै करदा ऐ जेहदा मकसद केन्द्र आस्सेआ प्रायोजित बक्ख-बक्ख स्कीमें दा लाह पजाना ऐ जिंदे च आप सहायता समूह बी इक न। आप सहायता समूह उनें लोकें दे अनोपचारिक ग्रुप होंदे न जेहड़े अपने जीवन स्तरै गी उबड़ा चुक्कने लेई किट्टे रलियै कम्म करदे न। आप सहायता समूहें कन्नै महिलाएं दी बड़ी मती मदद होआ करदी ऐ की जे इस बवस्था तैहत उनेंगी अपनी छमता मताबक किट्टे रलियै कम्म करने ते बजारें तोड़ी पुज्ज बनाने च मदाद होंदी ऐ। खारी ब्लाक दिएं 12एं पंचैतें च कोई 200 दे कोलकाल आप सहायता समूह न। एहदे तैहत महिलाएं गी प्रोत्साहन दे तौरा पर 15 जहार रुपें दी रकम कम्म करने लेई रिवाल्विंग फंड दे रूपे च उपलब्ध कराई जंदी ऐ। साढ़े जिजा संवाददाता अजय दीप सिंह कन्नै गल्ल करदे होई इक लाभार्थी नै आखेआ.....बाईट

<><><><><><>